

四庫全書

子部

欽定四庫全書

子部
冊府元龜卷八十二

詳校官中書臣瞿照

員外郎臣牛稔文覆勘

總校官庶吉士臣何思鈞

校對官中書臣徐步雲

謄錄監生臣陳國遠

欽定四庫全書

冊府元龜卷八十二

宋 王欽若等 撰

帝王部

赦宥

書曰宥過無大又曰青災肆赦易曰雷雨作解君子以
赦過宥罪周禮秋官司刺掌三宥三赦之法春秋書肆
大青斯皆赦宥之制也是知帝王以為死者不可復生
刑者不可復續故開仁恕之道行曠蕩之恩所以釋既

往之幸示自新之路也漢晉而下歷代相承至若展義
時巡遂行於慶賜弔民伐罪惟新其號令亦有覩災異
而戒懼因祥瑞而報功雖行渙汗之恩或起徼倖之弊
故古人有言曰赦不欲數數則惠奸非為政之善也管
子云赦者犇馬之委轡也是以王者戒而慎之

漢高祖二年立太子赦罪人

五年正月詔曰兵不得休八年萬民與

與音弋
庶切

苦甚今

天下事畢其赦天下殊死以下

六月壬辰大赦天下

六年十二月詔曰天下既安豪傑有功者封侯新立未能畫圖其功身居軍九年或未習法令或以其故犯法大者死刑吾甚憐之其赦天下

八年八月吏有罪未發覺者赦之

九年正月詔曰丙寅前有罪殊死以下皆赦之

十年七月癸卯太上皇崩葬萬年赦櫟陽囚死罪已下

萬年陵在櫟陽縣界特赦之

十一年秋七月淮南王布反上赦天下死罪已下皆令
從軍

十二年三月詔曰燕王綰與吾有故愛之如子聞與陳
豨有謀吾以為亡有故使人迎綰綰稱疾不來謀反明
矣燕吏民非有罪也賜其吏六百石已上爵各一級與
綰居去來歸者赦之

四月丁未大赦天下

孝惠四年三月甲子皇帝冠赦天下

孝文以高后八年閏七月乙酉即皇帝位即日夕入未央宮還坐前殿下詔曰丞相太尉御史大夫聞者諸呂用事擅權謀為大逆欲危劉氏宗廟賴將相列侯宗室大臣誅之皆伏其辜朕初即位其赦天下賜民爵一級女子百戶牛酒酺五日

二年正月丁亥詔曰夫農天下之本也其開藉田朕親率耕以給宗廟粢盛民謫作縣官及貸種食未入未備者赦之

三年七月詔曰濟北王背德反上誅誤吏民為大逆濟北吏民兵未至先自定及呂軍城邑降者皆赦之復官爵與王興居去來者赦之八月濟北王興居自殺赦諸與興居反者

十五年四月幸雍始郊見五帝大赦天下脩名山大川常祀而絕者有司以歲時致禮

後元四年五月赦天下免官奴婢為庶人

孝景元年四月赦天下賜民爵一級

三年正月吳王濞膠西王卬楚王戊趙王遂濟南王辟
光菑川王賢膠東王雄渠皆舉兵反大赦天下二月破
七國六月詔曰迺者吳王濞等為逆起兵相脅誑誤吏
民不得已今濞等已滅吏民當坐濞等及逋逃亡軍者
皆赦之

四年六月赦天下賜民爵一級

中元元年四月赦天下賜民爵一級

五年六月赦天下賜民爵一級

後元元年三月赦天下賜民爵一級中二千石諸侯相

爵右庶長

右庶長第十一爵

孝武建元元年二月赦天下賜民爵一級年八十復二

筭九十復甲卒

二筭二口之筭也復甲卒不豫革車之賦也

五月赦吳楚七

國帑輸在官者

吳楚七國反時其首事者妻子沒入為官奴婢武帝哀馬皆赦遣之也帑讀與

同

元光元年四月赦天下賜民長子爵一級

四年五月地震赦天下

六年春詔曰夷狄無義所從來久間者匈奴數寇邊境

故遣將撫師古者治兵振旅因遭虜之方入將吏新會

上下未輯

詔言古者出則治兵入則振旅素練其衆不虧戎律今之出師因遭寇虜方入為害而將

吏新會上下未和故校尉棄軍而奔北也輯與集同代郡將軍教雁門將軍廣所

任不肖

肖類似也不肖者言無所象類謂不才之人也

校尉又背義妄行棄軍

而北少吏犯禁少吏小吏也用兵之法不勤不教將率之過

也教令宣明不能盡力士卒之罪也將軍已下廷尉使

理正之而又加法於士卒二者並行非仁聖之心朕聞

衆庶陷害欲刷恥改行復奉正義厥路亡繇

一陷重刑無因復從

正道也繇讀與由同其赦雁門代郡軍士不循法者

元朔元年三月甲子詔曰朕聞天地不變不成施化陰陽不變物不暢茂易曰通其變使民不倦詩云九變復貫知言之選朕嘉唐虞而樂殷周據舊以鑿新其赦天下與民更始諸逋貸及訴訟在孝景後三年以前皆勿聽治

三年三月詔曰夫刑罰所以防姦也內長文所以見愛

也言有文德者即親內而崇長之以百姓之未洽于教

化朕嘉與士大夫日新厥業祇而不解其赦天下

解音懈

元狩元年四月赦天下丁卯詔曰朕聞咎繇對禹曰在
知人知人則哲惟帝難之蓋君者心也民猶支體支體
傷則心惜怛日者淮南衡山脩文學流貨賂兩國接壤
怵於邪說而造篡弒此朕之不德詩云憂心慘慘念國
之為虐已赦天下滌除與之更始

元鼎元年五月大赦天下

五年四月南越王相呂嘉反殺漢使及其王王太后乃赦天下

元封二年四月上祠泰山塞決河還赦所過徒賜孤獨高年米四石

六月詔曰甘泉宮內中產芝九莖連葉上帝博臨不異下房賜朕弘休

言天廣臨不以下房為幽側而隔異之賜以此芝

其赦天下賜

雲陽郡百戶牛酒

四年三月祠后土詔曰朕躬祭后土地祇見光集于靈

壇一夜三燭幸中都宮殿上見光其赦沔陰夏陽中都

死罪賜三縣及楊氏無出今年租賦

楊氏河東聚邑名

五年四月詔曰朕巡荆揚輯江淮物會大海氣以合泰
山上天見象增脩封禪其赦天下所幸縣毋出今年租
賜鰥寡孤獨帛貧窮者粟

六年三月祠后土詔曰朕禮首山崑田出珍物化或為

黃金

昆田首山下田也

祭后土神光三燭其赦沔陰殊死以下

賜天下貧民布帛人一疋

太初二年四月詔曰朕用事介山祭后土皆有光應介

在河東皮氏縣東南其特立周七十里高三十里其赦汾陰安邑殊死以下

天漢元年五月赦天下

三年三月行幸泰山脩封祀明堂還幸北地祠常山四月赦天下行所過毋出田租

太始元年六月赦天下

四年五月赦天下

征和三年五月赦天下

後元元年二月詔曰朕郊見上帝巡于北邊見羣鶴留

止以不羅罔靡所獲獻

時春也非用羅罔時故無所獲也

薦于泰時光

景并見其赦天下

孝昭以後元二年二月即位六月赦天下

始元元年七月赦天下賜民百戶牛酒

四年三月甲寅立皇后上官氏赦天下辭訟在後二年

前皆勿聽治

武帝後一年

元鳳元年六月赦天下十月詔曰燕王迷惑失道前與

齊王子劉澤等為逆抑而不揚望王反道自新今遇與長公主及左將軍桀等謀危宗廟王及公主皆自伏辜其赦王太子建公王子文信及宗室子與燕王上官桀等謀反父母同產當坐者皆免為庶人其吏為桀等所誣誤未發覺在吏者除其罪

二年六月赦天下

四年六月赦天下

六年夏赦天下

宣帝以元平元年七月即位九月赦天下

本始元年五月鳳凰集膠東千乘大赦天下賜吏二千石諸侯相下至中都官宦吏六百石爵各有差自左更至五大夫賜天下人爵各一級女子百戶牛酒租稅勿收

四年三月乙卯立皇后霍氏賜丞相已下至郎吏從官金錢帛各有差赦天下

四月壬寅郡國四十九地震或山推水出詔曰蓋災異

者天地之戒也朕承洪業奉宗廟託于士民之上未能
和羣生迺者地震北海瑯邪壞祖宗廟朕甚懼焉丞相
御史其與列侯中二千石博問經學之士有以應變輔
朕之不逮毋有所諱令三輔太常內郡國與賢良方正
各一人律令有可蠲除以安百姓條奏被地震壞敗甚
者勿收租賦大赦天下

地節二年四月鳳凰集魯羣鳥從之大赦天下

三年四月立皇太子大赦天下

四年七月大司馬霍禹謀反詔曰迺者東織室令史張
赦使魏郡豪李竟報冠陽侯霍雲謀為大逆朕以大將
軍故抑而不揚冀其自新今大司馬博陸侯禹與母宣
成侯夫人顯及從昆弟冠陽侯雲樂平侯山諸姊妹壻
度遠將軍范明友長信少府鄧廣漢中郎將任勝騎都
尉趙平長安男子馮殷等謀為大逆顯前又使女侍醫
淳于衍進藥殺共哀后謀毒太子欲危宗廟逆亂不道
咸伏其辜諸為霍氏所誑誤未發覺在史者皆赦除之

元康元年三月詔曰迺者鳳凰集泰山陳留甘露降未央宮朕未能章先帝休烈協寧百姓承天順地調序四時獲蒙嘉瑞賜茲祉福夙夜兢兢靡有驕色內省匪懈永惟罔極書不云乎鳳凰來儀庶尹允諧其赦天下徒賜勤事吏中二千石以下至六百石爵自中郎更至五大夫佐史以上二級民一級女子百戶牛酒加賜鰥寡孤獨三老孝弟力田帛所賑貸勿收

二年正月詔曰書云文王作罰刑茲無赦今吏脩身奉

法未有能稱朕意朕甚愍焉其赦天下與士大夫勵精
更始

神爵二年二月詔曰迺者正月乙丑鳳凰甘露降集京
師羣鳥從之萬數朕之不德屢獲天福祇事不怠其赦
天下

四年二月詔曰迺者鳳凰甘露降集京師嘉祥并見脩
興泰一五帝后土之祠祈為百姓蒙祉福鸞鳳萬舉蜚
覽翱翔集止于旁齋戒之暮神光顯著薦菴之夕神光

交錯或降于天或登于地或從四方來集于壇上帝嘉饗海內承福其赦天下賜民爵一級女子百戶牛酒鰥寡孤獨高年帛

五鳳元年夏赦徒作杜陵者

三年三月詔曰往者匈奴數為邊寇百姓被其害朕承至尊未能綏安匈奴虛間權渠單于請求和親病死右賢王屠耆堂諸王並自立分為五單于更相攻擊死者以萬數畜產大耗什八九人民饑餓相燔燒以求食因

大乖亂單于闕氏子孫昆弟及呼遼累單于名王右伊
秩訾且渠當戶以下將衆五萬餘人來降歸義單于稱
臣使弟奉珍朝賀正月北邊晏然靡有兵革之事朕飭
躬齋戒郊上帝祠后土神光並見或興于谷燭耀齋宮
十有餘刻甘露降神爵集已詔有司告祠上帝宗廟三
月辛丑鸞鳳又集長樂宮東闕樹上飛下止地文章五
色留十餘刻吏民並觀朕之不敏懼不能任婁婁讀蒙
曰屢
嘉瑞獲茲祉福書不云乎雖休勿休祇事不怠公卿大

夫其勗焉減天下口錢赦殊死已下賜民爵一級女子百戶牛酒大酺五日賜鰥寡孤獨高年帛

甘露二年正月詔曰迺者鳳凰甘露降集黃龍登輿醴泉滂流枯槁榮茂神光並見咸受禎祥其赦天下減民算三十賜諸侯王丞相將軍列侯中二千石金錢各有差賜民爵一級女子百戶牛酒鰥寡孤獨高年帛

元帝初元元年正月辛丑孝宣皇帝塋杜陵賜諸侯王公主列侯黃金吏二千石以下錢帛各有差大赦天下

二年三月詔曰迺者二月戊午地震于隴西郡毀落太

上皇廟殿壁木飾壞敗獮道縣

獮道屬天水音桓

城郭宮寺及

民室屋壓殺人衆山摧地裂水泉湧出惟天降災震驚朕師其間者歲數不登元元困乏不勝饑寒以陷刑辟朕甚閔之郡國被地動災甚者無出租賦赦天下有可蠲除減省以便萬民者條奏毋有所諱

三年四月詔曰迺者火災降於孝武園館咎在朕躬百

姓仍遭凶阨

阨與厄同

無以相振加以煩擾乎苛吏拘牽乎

徵文不得永終性命朕甚閔焉其赦天下

四年三月行幸河東祠后土赦汾陰徒賜民爵一級女子百戶牛酒鰥寡高年帛行所過無出租賦

永光元年正月行幸甘泉郊泰畤赦雲陽徒三月詔曰

壬人在位

壬人佞人也

吉士壅蔽重以周秦之弊民漸薄俗

去禮義觸刑法豈不哀哉繇此觀之元元何辜其赦天下令勵精自新

二年二月詔曰今陰陽未調三光曖昧元元大困流散

道路盜賊并興是皆朕之不明朕自甚耻為民父母若是之薄謂百姓何其大赦天下

六月詔曰間者連年不收四方咸困於饑饉亡以相救朕為民父母德不能覆而有其刑甚自傷焉其赦天下四年二月詔曰朕承至尊之重不能燭理百姓屢遭凶咎加以邊境不安師旅在外賦斂轉輸元元騷動窮困亡聊犯法抵罪夫上失其道而繩下以深刑朕甚痛之其赦天下所貸民勿收責

建昭二年四月赦天下

四年正月以誅郅支單于告祠郊廟赦天下

五年三月詔曰蓋開明王之治國也明好惡而定去就

崇敬讓而民興行故法設而民不犯令施而民從今朕

獲保宗廟兢兢業業匪敢懈怠德薄明暗晦暗與暗教化淺

微傳不云乎百姓有過在予一人其赦天下

成帝以竟寧元年六月即位七月大赦天下

建始元年二月詔曰迺者火災降於祖廟有星孛于東

方始正而虧咎孰大焉羣公攷攷帥先百寮輔朕不逮
崇寬大長和睦凡事恕已毋行苛刻其赦天下使得自
新

二年正月辛巳上始郊祀長安南郊詔曰迺者徒秦時
后土于南郊北郊朕親飭躬郊祀上帝皇天報應神光
並見赦奉郊縣長安長陵及中都官耐罪徒

三年三月赦天下徒

河平元年四月己亥晦日有食之既詔曰朕獲保宗廟

戰戰栗栗未能奉稱傳曰男教不脩陽事不得則日為之蝕天著厥異辜在朕躬公卿大夫其勉悉心以輔不逮百寮各脩其職惇任仁人退遠殘賊陳朕過失無有所諱大赦天下

四年正月匈奴單于來朝赦天下徒賜孝弟力田爵二級

陽朔元年二月丁未晦日有蝕之三月大赦天下

四年二月赦天下

鴻嘉元年二月行幸初陵赦作徒

三年四月赦天下

永始四年春行幸甘泉郊泰畤神光降集紫殿大赦天下

元延元年四月赦天下

綏和元年正月大赦天下

哀帝以綏和二年四月丙午即位大赦天下

建平元年正月赦天下

二年四月詔曰漢家之制推親親以顯尊尊定陶恭皇之號不宜復稱定陶尊恭皇太后曰帝太后恭皇后曰帝太后立恭皇廟于京師赦天下徒

六月待詔夏賀良等言赤精子之識

詔以材技徵召未有正官故曰待詔

高祖感赤龍而生自謂赤帝之精賀良等因是作讖文漢家歷運中衰當再受命

宜改元易號詔曰漢興二百載歷數開元皇天降非材之佑漢國再獲受命之符朕之不德曷敢不通夫基事之元命

基始也始為大事之命

必與天下自新其大赦天下以建

平二年為太初元年號曰陳聖劉太平皇帝

陳舜後王莽陳之後

謬語以明莽當篡立而不知漏刻以百二十為度

八月詔曰待詔夏賀良等建言改元易號增益漏刻可以永安國家朕過聽其言冀為海內獲福卒亡嘉應皆違經背古不合時宜六月甲子制書非赦令也皆蠲除

之

言非赦書事皆除之

元壽元年正月辛丑朔日有蝕之詔曰朕獲保宗廟不明不敏夙夜憂勞未皇寧息

皇暇也

惟陰陽不調元元不

瞻未睹厥咎婁勅公卿庶幾有望婁古字至今有司執法

未得其中

音竹仲切

或上暴虐假執獲名溫良寬柔陷於亡

滅是故殘賊彌長和睦日衰百姓愁怨靡所錯躬

錯置也音

七故切

乃正月朔日有蝕之厥咎不遠在予一人公卿大

夫其各悉心勉帥百寮救任仁人黜遠殘賊期於安民
陳朕之過失無有所諱其與將軍列侯中二千石舉賢
良方正能直言者各一人大赦天下

平帝以元壽二年九月即位大赦天下

元始元年五月丁巳朔日有蝕之大赦天下

九月赦天下徒

四年二月丁未立皇后王氏大赦天下

後漢光武以更始二年六月己未即位於鄴南千秋亭
五成陌改元建武大赦天下

二年三月大赦天下

六月戊戌立貴人郭氏為皇后子彊為皇太子大赦天

下

三年正月壬午大赦天下

六月壬戌大赦天下

四年四月甲申大赦天下

五年二月丙午大赦天下

五月丙子詔曰久旱傷麥秋種未下朕甚憂之將殘吏未勝獄多寃結元元愁恨感動天氣乎其令中都官三

輔郡國出繫囚

中都官謂京師諸官府也國謂諸侯王國也

罪非犯殊死一

切勿案

殊死謂斬刑殊絕也左傳曰斬其木而弗殊一切權時非久制也

見徒免為庶

人務進柔良退貪酷各正厥事焉

六年五月辛丑詔曰惟天水隴西安定北地吏人為隗
囂所誑誤者又三輔遭難赤眉有犯法不道者自殊死
以下皆赦除之是年九月庚子赦樂浪謀反大逆殊死
已下

七年正月丙申詔中都官三輔郡國出繫囚非犯殊死
皆一切勿案其罪見徒免為庶民耐罪亡命吏以文除

之耐輕罪之名漢書音義曰一歲刑為罰作二歲刑以
上為耐耐音乃代切亡命謂犯耐罪而改名逃者今

吏為文簿記其姓名而除其罪恐遂逃不歸因失名籍

四月壬午詔曰比陰陽錯謬日月薄食百姓有過在予一人大赦天下

十八年七月吳漢拔成都斬史歆等壬戌赦益州所部殊死已下

二十三年九月詔曰日者地震南陽尤甚朕甚懼焉其令南陽勿輸今年田租芻藁其死罪繫囚在戊辰前減死罪一等徒皆弛解鉗衣絲絮

舊法徒者不得衣絮今赦許之

二十四年正月乙亥大赦天下

二十九年二月丁巳朔日有蝕之遣使者舉冤獄出繫囚四月詔令天下繫囚自殊死以下及徒各減本罪一等其餘贖罪輸作各有差

中元元年四月己卯大赦天下改元

明帝以中元二年二月戊戌即位四月詔弛刑及郡國徒在中元元年四月己卯赦前所犯而後捕繫者悉免刑邊人遭亂為內郡人妻在己卯赦前一切遣還恣其

所樂中二千石下至黃綬貶秩贖論者悉皆復秩還贖
永平二年正月祠明堂禮畢登靈臺使尚書令持節詔
驃騎將軍三公曰今令月吉日宗祀光武皇帝於明堂
以配五帝禮備百物樂和八音詠祉福舞功德其班時
令勅羣后事畢升靈臺望元氣吹時律觀物變羣寮藩
輔京室子孫衆郡奉計百蠻貢職烏桓濊貊咸來助祭
單于侍子骨都侯亦皆陪位斯固聖祖功德之所致也
朕以閭陋奉承大業親執珪璧恭祀天地仰惟先帝受

命中興撥亂反正以寧天下封泰山建明堂立辟雍起
靈臺恢弘大道被之八極而嗣子無成康之質羣臣無
呂且之謀鹽洗進爵踧踏惟慙素性頑鄙臨事益懼故
君子坦蕩蕩小人長戚戚其今天下自殊死已下謀反
大逆皆赦除之百寮師尹其勉脩厥職順行時令敬若
昊天以綏兆人

十年四月戊子詔曰昔歲五穀登衍今茲蠶麥善收其
大赦天下方盛夏長養之時蕩滌宿惡以報農功百姓

勉務桑稼以備水旱吏敬厥職無令愆墮

十五年四月乙巳大赦天下其謀反大逆及諸不應宥者皆赦除之

章帝以永平十八年八月壬子即位十月丁未大赦天下

建初二年四月戊子詔還坐楚淮陽事徙者四百餘家令歸本鄉

三年正月己酉宗祀明堂禮畢登靈臺望雲物大赦天

下

元和元年八月詔曰朕道化不德吏政失和元元未諭
抵罪於下寇賊爭心不息邊野邑屋不脩永惟庶事思
稽厥衷與凡百君子共弘斯道中心悠悠將何以寄其
改建初九年為元和元年郡國中都官繫囚減死一等
勿笞詣邊縣妻子自隨占者在所其犯殊死一切募下
蚕室其女子宮繫囚鬼薪白粲以上皆減本罪一等輸
司寇作亡命者贖各有差

十二月詔曰書云父不慈子不祇兄不友弟不恭不相及也往者妖言大獄所及廣遠一人犯罪禁至三屬莫得垂纓仕宦王朝如有賢才而沒齒無用朕甚憐之非所謂與之更始也諸以前妖惡禁錮者一皆蠲除之以明棄咎之路但不得在宿衛而已

二年二月東巡狩丙子詔曰朕巡狩岱宗柴望山川告

祀明堂以章先勲其二王之後

禮記曰存二王之後尊賢不過二代公羊傳曰

二王之後所以通三王也漢之二王殷周之後也

先聖之裔

東觀記曰孔子後褒成侯等咸來助

祭東后藩衛

東后謂東方國君也諸侯為天子藩屏故曰藩衛

伯父伯兄仲叔

季弟幼子童孫

尚書呂刑文皆天子同姓諸侯有父叔兄弟子孫列者故總而言之

百寮

從臣宗室眾子要荒四裔

要荒二服名要服去王城二千里荒服去王城二千五百

里要者言可要約以文教荒者言其荒忽無常也高遠也謂荒服之外

沙漠之北葱嶺之

西

西河舊事曰葱嶺山名在敦煌西其山高大多葱故以為名焉

冑彫之類

字書曰彫多須貌音

而言其須多蒙冑其面或曰西域人多著冑而長故舉以為言也

跋涉懸度

草行曰跋水行曰涉

左傳子太叔曰跋涉山川西域傳曰懸度者石山也溪谷不通以繩索相引而度去陽關五千八百五十里

陵棧阻絕駿奔郊時

駿疾也音俊尚書駿奔走郊時祭天處也漢書音義曰時神靈之居

止者咸來助祭祖宗功德延及朕躬予一人空虛久疾纂

承尊明

疾病也纂繼也

盥洗享薦慙媿祇慄詩不云乎君子如

祉亂庶遑已

詩小雅遑速也已止也祉福也鄭玄注云福者福賢者謂爵祿之也如此則亂亦庶

幾可疾止也

歷數既從靈燿著明

歷數既從謂行四分歷也靈燿著明謂日月貞明

亦欲與士大夫同心自新其大赦天下諸犯罪不當得赦者皆除之復博奉高瀛無出今年田租芻藁

和帝永元二年五月丁丑大赦天下

三年十二月庚辰帝至自長安減弛刑徒從駕者刑

五年正月乙亥宗祀五帝於明堂遂登靈臺望雲物大赦天下

六年七月京師旱詔中都官徒各除半刑謫其未竟五月已下皆免遣

十一年二月詔郡國中都官徒及篤癯老小女徒各除半刑未竟三月者皆免歸田里

四月丙寅大赦天下

十四年三月戊辰臨辟雍饗射大赦天下

元興元年四月庚午大赦天下改元宗室以罪絕者復屬籍

安帝永初元年正月癸酉朔大赦天下

六月丁卯赦除諸羌相連結謀叛逆者罪

三年正月庚子皇帝加元服大赦天下

四年二月詔自建初以來諸妖言它過坐徙邊者各歸本郡其没入官為奴婢者免為庶人

三月戊子杜陵園火癸巳郡國九地震四月司隸豫兗

徐青冀六州蝗丁丑大赦天下

五年二月詔隴西徙襄武安定徙美陽上郡徙衙

左傳戰於

彭衙是也北地徙池陽閏月丁酉赦涼州河西四郡

六年六月辛巳大赦天下

元初元年四月丁酉大赦天下

二年十月詔吏人聚為盜賊有悔過者除其罪

三年三月赦蒼梧鬱林合浦南海吏人為賊所迫者

四年二月乙卯大赦天下

永寧元年四月丙寅立皇子保為皇太子改元大赦天

下

建元元年二月癸亥大赦天下七月己卯改元大赦天

下

延光元年三月丙午改元大赦天下還徙者復戶邑屬

籍

順帝永建元年正月甲寅詔曰先帝聖德享祚未永早
棄鴻烈姦慝緣間人庶怨讟上干和氣疫癘為災朕奉

承大業未能寧濟蓋至理之本稽弘德惠蕩滌宿惡與人更始其大赦天下賜男子爵人二級為父後三老孝弟力田三級流民欲自占者一級鰥寡孤獨篤癯貧不能自存者粟人五斛貞婦帛人三疋坐法當徙勿徙亡

徒當傳勿傳

徒因逃亡當傳捕者放之弗捕

宗室以罪絕皆復屬籍其

與閭顯江京等交通者悉勿考勉脩厥職以康我民

四年正月丙寅詔曰朕託王公之上涉道日寡政失厥中陰陽氣隔寇盜肆暴庶獄彌繁憂悴永歎疾如疾首

詩云君子如祉亂庶遄已三朝之會明旦立春嘉與海
內洗心自新其赦天下從甲寅赦令已來復秩屬籍三
年正月已來還贖其閭顯江京等知識婚姻禁錮一原
除之一猶皆也務崇寬和敬順時令遵典去苛以稱朕意

陽嘉元年三月庚寅帝臨辟雍饗射大赦天下改元

九月詔郡國中都官繫囚皆減死一等亡命者贖各有
差

三年五月戊戌制詔曰昔我太宗丕顯之德假于上下

儉以恤民政致康乂朕秉事不明政失厥道天地譴怒
大變仍見春夏連旱寇賊彌繁元元被害朕甚慙之加
與海內洗心更始其赦天下自殊死已下謀反大逆諸
犯不當得赦者赦除之

永和元年正月己巳宗祀明堂登靈臺大赦天下
四年四月戊午大赦天下賜民爵及粟帛各有差
漢安元年春正月癸巳宗祀明堂大赦天下

建康元年四月立皇子炳為皇太子大赦天下賜人爵

各有差

質帝以永嘉元年正月丁丑即位二月乙酉大赦天下
賜人爵及粟帛各有差還王侯所削戶邑

本初元年六月大赦天下賜民爵及粟帛各有差

桓帝建和元年正月大赦天下賜吏更勞一歲男子爵
人二級為父後及三老孝弟力田人三級鰥寡孤獨篤
癯貧不能自存者粟人五斛貞婦帛人三尺災害所傷
什四以上勿收錢租其不滿者以實除之

四月詔郡國繫囚減死罪一等勿笞惟謀反大逆不用此書

二年正月甲子皇帝加元服庚午大赦天下

三年五月乙亥詔曰間者日食毀缺陽光晦暗朕祇懼
潛思匪遑啓處昔孝章皇帝愍前世禁徙故建初之元
並蒙恩澤流徙者使還故郡没入者免為庶人先皇德
政可不務乎其自永建元年迄乎今歲凡諸妖惡支親
從坐及吏民減死徙邊者悉歸本郡唯没入者不從此

令

和平元年正月甲子大赦天下

元嘉元年正月癸酉大赦天下

永興元年正月大赦天下

二年春正月甲午大赦天下

永壽元年正月戊申大赦天下

三年正月己未大赦天下

延熹元年六月戊寅大赦天下

三年正月大赦天下

四年六月京兆扶風及涼州地震庚子岱山及博尤來山並頽裂己酉大赦天下

六年三月戊戌大赦天下

八年三月辛巳大赦天下

永康元年六月庚申大赦天下悉除黨錮

時李膺等願引宦者子弟

宦官懼請帝以天時當赦帝許之故除黨錮也

靈帝以建寧元年正月庚子即位二月庚午謁高廟辛

未謁世祖廟大赦天下賜民爵及帛各有差

二年正月丁未大赦天下

四年正月甲子帝加元服大赦天下賜公卿以下各有差唯黨人不赦

熹平元年五月己巳大赦天下

二年二月壬午大赦天下

三年二月己巳大赦天下

四年五月丁卯大赦天下

五年四月癸亥大赦天下是月使侍御史行詔獄亭部
理冤枉原輕繫囚徒

六年正月辛丑大赦天下

光和元年三月辛丑大赦天下

二年四月丁酉大赦天下諸黨人禁錮小功以下皆除

之時上祿長和淳上言黨人錮及五族有乖典訓帝乃從之

三年正月癸酉大赦天下

四年四月庚子大赦天下

五年正月辛未大赦天下

六年三月辛未大赦天下

中平元年二月鉅鹿人張角自稱黃天其部帥有三十

六萬皆着黃巾同日反三月壬子大赦天下黨人還諸

徙者唯張角不赦

時中常侍呂強言於帝曰黨錮久積若與黃巾合謀悔之無救帝懼皆赦

之

十二月己巳黃巾平大赦天下

三年二月庚戌大赦天下

四年正月己卯大赦天下

五年正月丁酉大赦天下

少帝以中平六年四月即位大赦天下

光熹元年八月戊辰中常侍張讓等劫少帝走小平津
尚書盧植追斬讓等辛未還宮大赦天下改光熹為昭
寧

獻帝以昭寧元年九月甲戌即位大赦天下改元永漢
初平元年正月山東州郡起兵以討董卓辛亥大赦天

下

二年正月辛丑大赦天下

三年正月丁亥大赦天下

五年丁酉大赦天下

六月董卓部曲將李灌等陷長安己未大赦天下

四年正月丁卯大赦天下

興平元年正月辛丑大赦天下改元

二年正月癸丑大赦天下

建安元年正月癸酉郊祀上帝於安邑大赦天下
七月甲子車駕至雒陽丁丑郊祀上帝大赦天下

魏文帝以延康元年十一月庚子受漢禪即位於繁陽
改延康為黃初大赦

黃初五年八月為水軍親御龍舟循蔡頴浮淮幸壽春
揚州界將吏士民犯五歲刑已下皆原除之九月遂至
廣陵赦青徐二州

明帝以黃初七年五月丁巳即位大赦

太和二年三月丁未幸長安四月丁酉還雒陽宮赦繫囚非殊死已下

五年七月己酉皇太子殷生大赦

青龍二年三月己酉大赦

四年十二月幸許昌宮明年改元景初五月己巳行還雒陽宮己丑大赦

景初元年十月遼東太守公孫淵叛己卯詔遼東將吏士民為淵所脅略不得已降者一切赦之

二年四月庚戌大赦

齊王以景初三年正月丁亥朔即帝位大赦七月齊王始親臨朝八月大赦

正始四年四月乙卯立皇后甄氏大赦

嘉平元年正月以誅曹爽丙午大赦

三年三月壬辰大赦天下

四年二月立皇后張氏大赦

五年三月辛亥大赦四月立皇后王氏大赦

高貴鄉公以嘉平六年九月司馬景王廢齊王十月己丑公即位詔曰昔三祖神武聖德應天受祚齊王嗣位肆行非度顛覆厥德皇太后深惟社稷之重延納宰輔之謀用替厥位集大命于予一人以眇眇之身託于王公之上夙夜祇畏懼不能嗣守祖宗之大訓恢中興之洪業戰戰兢兢如臨于谷今羣公卿士股肱之輔四方征鎮宣力之佐皆積德累功忠勤帝室庶憑先祖先父有德之臣左右小子用保乂皇家俾朕蒙暗垂拱而治

蓋聞人君之道德厚侔天地潤澤施四海先之以慈愛
示之以好惡然後教化行於上兆民聽於下朕雖不德
昧於大道思與宇內共臻茲慶書不云乎安民則惠黎
民懷之大赦改元正元

正元二年閏正月壬子以母丘儉文欽平特赦淮南士
民諸為儉欽所誣誤者

三月立皇后卞氏大赦

十一月甲午以隴右四郡及金城連年受敵或亡叛投

賊其親戚留在本土者不安皆特赦之

甘露二年五月以諸葛誕反丙子赦淮南將吏士民為
誕所誣誤者

九月大赦

陳留王以甘露五年六月甲寅嗣位大赦改元景元賜
民爵及穀帛各有差

景元四年十一月大赦是月巴蜀平

咸熙元年二月鍾會反於蜀為衆所討辛卯特赦諸在

益土者

二年五月詔晉王加殊禮癸未大赦

九月乙未大赦

晉武帝以魏咸熙二年十二月丙寅受禪設壇于南郊
即雒陽宮幸太極前殿詔曰昔朕皇祖宣王聖哲欽明
誕應期運熙帝之載肇啓洪基伯考景王履道宣猷緝
熙諸夏至于皇考文王獻哲光遠允協靈祇應天順時
受茲明命仁濟于宇宙功格於上下肆魏氏引鑒于古

訓儀刑于唐虞疇咨羣后爰輯大命於朕身予一人畏天之命用不敢違惟朕寡昧負荷洪烈託于王公之上以君臨四海惴惴恐懼罔知所濟惟爾股肱爪牙之佐文武不二之臣乃祖乃父實左右我先王光隆我大業思與萬國共饗休祚於是大赦改元秦始賜天下爵人五級鰥寡孤獨不能自存者穀人五斛復天下租賦及關市之稅一年逋債宿負一皆勿收除舊嫌解禁錮亡官失爵者悉復之

泰始四年正月丁亥耕于籍田戊子詔曰古設象刑而
衆不犯今雖參夷而姦不絕何德刑相去之遠哉先帝
深愍黎元哀矜庶獄乃命羣后考正典刑朕守遺業永
惟保乂皇基思與萬國以無為為政方今陽春養物東
作始興朕親率王公卿士耕籍田千畝律令既就班之
天下將以簡法務本惠育海內宜寬有罪使得自新其
大赦天下

五年二月赦五歲刑已下

四月曲赦交陟九真日南五歲刑

六年三月赦五歲刑已下

七年五月雍梁秦三州飢赦其境內殊死已下

八月分益州之南中四郡置寧州曲赦四郡殊死已下

八年六月壬辰大赦

咸寧元年正月戊午朔大赦改元

二年二月甲午赦五歲刑已下十月丁卯臨軒遣太尉

賈充策立皇后楊氏因大赦賜王公已下至于鰥寡各

有差百寮上禮

五年三月星孛于柳四月又孛于女御大赦降除部曲督以下質任

太康元年三月吳孫皓降乙酉大赦改元大酺五日恤孤老困窮

十年四月太廟成乙巳遷神主於新廟帝迎於道左遂禘祭大赦文武增位一等作廟者二等

惠帝以太熙元年四月即位大赦改元永熙

永平元年三月誅太傅楊駿壬辰大赦改元

元康元年六月賈后矯詔使楚王瑋殺太宰汝南王亮
太保衛瓘乙丑又殺瑋曲赦雒陽

二年八月壬子大赦

四年八月上谷居庸上庸並地陷裂人有死者大饑九
月丙辰赦諸州之遭地災者

六年正月大赦

十月秦雍氏羌叛推齊萬年稱帝乙未曲赦雍涼二州

八年三月壬戌大赦

永康元年正月癸亥朔大赦改元

四月趙王倫矯詔廢賈后大赦

八月淮南王允舉兵討趙王倫不克遇害曲赦雒陽

十一月甲子立皇后羊氏大赦

永寧元年正月趙王倫篡位四月齊王冏逐倫歸第乘

輿反正癸亥詔曰朕以不德慕承皇統遠不能光濟大

業靖綏四方近不能開明刑威式遏姦宄至使逆臣孫

秀敢肆凶虐窺間王室遂奉趙王倫饗據天位鎮東大將軍齊王冏征北大將軍成都王穎征西大將軍河間王顥並以明德茂親忠規允著首建大策圖救國難尚書准共立大謀左衛將軍王興與羣公卿士協同謀略親勒本營斬秀及其二子前趙王倫為秀所誤與其子等已詣金墉迎朕幽宮旋軫閭闔豈在予一人獨饗其慶宗廟社稷實有賴焉於是大赦改元孤寡賜殺五斛大酺五日誅侯質等及倫之黨

六年壬辰大赦增吏位二等八月大赦戊辰原徙邊者
太安元年三月赦司冀兗豫四州十二月長沙王又攻
殺齊王冏大赦改元

二年正月甲子朔赦五歲八月河間王顥成都王穎舉
兵逼京師帝出幸于城東丙申大赦

永興元年正月成都王穎自鄴諷于帝大赦改元永安
三月戊申詔曰朕以不德纂承洪緒于茲十有五載禍
亂滔天姦逆仍起至幽廢重宮宗廟圯絕成都王穎溫

仁惠和克平暴亂其以穎為皇太弟都督中外諸軍事
丞相如故大赦賜鰥寡高年帛三尺大酺五日

七月丙申朔右衛將軍陳旻以詔勒兵討成都王穎大
赦復皇后羊氏及皇太子覃已亥帝北征軍敗幸穎軍
明日辛鄴庚申大赦改元建武八月匈奴左賢王劉元
海遣王浚攻穎大敗穎奉帝走雒陽辛巳大赦

十一月乙未帝幸長安遺宮在雒陽者為留臺承制行
事丙午留臺大赦改元復為永安十二月大赦改元永

興

二年八月辛丑大赦

懷帝以光熙元年十一月癸酉即位大赦

永嘉元年正月癸丑大赦改元

三月庚午立豫章王詮為皇太子辛未大赦

八月撫軍苟晞敗汲桑於鄴甲辰大赦幽并司冀兗豫

等六州

二年正月丁未大赦

十二月辛未朔大赦

三年三月丁巳東海王越勒兵收近臣中書令繆播等
害之丙寅曲赦河南郡

四年正月乙丑朔大赦

六年九月雍州刺史賈疋奉秦王為皇太子大赦
愍帝建興元年壬申即位大赦改元

二年正月己巳朔黑霧五日乃止辛未隕于地三日出
西方丁未大赦

三年四月大赦

六年丁未地震辛巳大赦

冊府元龜卷八十二

欽定四庫全書

冊府元龜卷八十三

宋 王欽若等 撰

帝王部

赦宥第二

晉元帝建武元年三月辛卯即晉王位大赦改元其殺
祖父母父母及劉聰石勒不從此令

太興元年三月丙辰即皇帝位大赦改元文武增位二
等

二年十二月乙亥大赦

臣欽若等曰諸只言大赦者按本史別無赦文

永昌元年正月乙卯大赦改元

明帝以永昌元年閏十一月庚寅即位大赦

太寧二年正月庚辰赦五歲刑已下

七月王敦舉兵向闕遣其兄含等至南岸帝躬率六軍
出攻南皇堂王含兵敗敦憤惋死丁酉帝還宮大赦惟
敦黨不原

三年三月戊辰立皇子衍為皇太子大赦增文武位二

等大酺三日賜鰥寡孤獨帛人二疋

成帝以大寧三年閏三月乙丑即位大赦增文武位二等賜鰥寡孤老帛人二疋

咸和元年二月丁亥大赦改元大酺五日賜鰥寡孤老米人二斛京師百里內復一年十月庚辰赦百里內五歲刑已下

四年二月蘇峻平丁亥大赦

五年正月己亥大赦

七年正月辛未大赦

八年正月辛亥朔詔曰昔大賊縱暴宮室焚蕩元惡雖
翦未暇營築有司屢陳朝會逼狹遂作斯宮子來之勞
不日而成既獲臨御大饗羣后九賓充庭百官象物知
君子勤禮小人盡力矣思蠲密網咸同斯會其赦五歲
刑以下

咸康元年正月庚午朔帝加元服大赦改元增文武祿
位一等大酺五日賜鰥寡孤獨不能自存者米五斛

二年正月辛亥立皇后杜氏大赦增文武位一等

六年三月丁卯大赦

八年正月乙丑大赦

康帝以咸康八年六月甲午即位大赦

建元元年十一月己巳大赦

穆帝以建元二年九月己亥即位大赦

永和二年正月丙寅大赦

三年六月辛酉大赦

五年正月辛巳朔大赦

九年正月乙卯朔大赦

升平元年正月壬戌朔帝加元服大赦改元

八月丁未立皇后何氏大赦賜孝悌鰥寡米五斛逋租宿債皆勿收大酺三日

五年正月戊戌大赦賜鰥寡孤獨不能自存者人米五斛

哀帝以升平五年五月庚申即位大赦

隆和元年正月壬子大赦改元

興寧元年二月己亥大赦改元九月癸亥以皇子生大赦

廢帝以興寧三年二月丙申即位大赦

太和元年五月江夏相朱序攻司馬勲於成都衆潰斬勲九月甲午曲赦梁益二州

三年三月丁巳朔日有蝕之癸亥大赦

六年四月戊午大赦

簡文帝咸安元年十一月己酉即位戊午詔曰王室多
故穆哀早世皇裔風遷神器無主東海王以母弟近屬
入纂大統嗣位經年昏闇亂常人倫虧喪大禍將及則
我祖宗之靈靡知所託皇太后深懼皇基特定大計司
馬因順天人協同神畧親帥羣后恭承明命雲霧既除
皇極載清乃顧朕躬仰承洪緒雖伊尹之寧殷朝博陸
之安漢室無以尚也朕以寡德猥居元首實懼眇然不
克負荷戰戰兢兢罔知攸濟思與兆庶更始其大赦天

下大酺五日增文武位二等賜孝順忠貞鰥寡孤獨米
人五斛

孝武帝以咸安二年七月己未即位詔曰朕以不造奄
丁閔凶號天叩地靡知所訴藐然幼冲眇若綴旒深惟
社稷之重大懼不克負荷仰憑祖宗之靈積德之祀先
帝淳風玄化遺澤在民宰輔英賢勲隆德盛顧命之託
寔賴規訓羣后率職百寮勤政興孤弱之躬有寄皇極
之基不墜先恩遺惠播于四海思弘餘潤以康黎庶其

大赦天下與民更始

寧康二年正月癸未朔大赦

三年正月辛亥大赦八月癸巳立皇后王氏大赦文武
加位一等

太元元年正月壬寅朔帝加元服見于太廟皇太后歸
政甲辰大赦改元

五月癸丑地震甲寅詔曰頃者上天垂鑒謹告屢彰朕有
懼焉震惕于心思所以議獄緩死赦過宥罪庶回大變

與之更始於是大赦增文武位各一等

四年正月辛酉大赦郡縣遭水者減租稅

五年四月癸酉大赦五歲刑以下

六月甲子以比歲荒儉大赦五日太元三年以前逋租宿債皆蠲除之

六年七月丙子赦五歲刑已下

八年二月辛巳大赦十二月庚午以苻堅寇難初平大赦

九年十一月乙丑以玄象乖度大赦

十年八月甲午大赦

十二年正月丁未大赦八月辛巳立皇子德宗為皇太子大赦增文武位二等大酺五日

十五年三月戊辰大赦

十七年正月己巳朔大赦除逋租宿債

安帝以太元二十一年九月辛酉即位大赦

隆安元年四月戊戌兖州刺史王恭等舉兵以討尚書

左僕射王國寶建威將軍王緒為名甲申殺國寶緒以
說恭等乃罷兵戊子大赦

二年九月王恭敗收送京師斬之十月丙子大赦

四年正月乙亥大赦七月丁卯大赦

元興元年正月庚午朔大赦改元十二月庚申曲赦廣
陵彭城大逆以下

三年三月桓玄逼帝西上密詔武陵王遵依舊典承制
總百官大赦謀反大逆以下惟桓玄一祖之后不宥五

月督護馮遷斬桓玄乘輿反正于江陵詔曰姦兇篡逆自古有之朕不能式遏杜漸以致播越賴鎮軍將軍裕英略奮發忠勇絕世冠軍將軍毅等誠心宿著協同嘉謀義聲既振士庶效節社稷載安四海共慶其大赦凡諸畏逼事屈逆命者一無所問

義熙元年正月帝在江陵振武將軍劉道規擊走桓謙詔曰朕以寡德夙纂洪緒不能緝熙遐邇式遏姦兇逆臣桓玄乘釁肆亂乃誣罔天人篡據極位朕躬播越淪

胥荒裔宣皇之基眇焉以墜賴鎮軍將軍忠武英斷誠
冠終古運謀機始貞賢協其契枚淚誓衆義士感其心
故霜戈一揮巨猾奔迸三率稜威大慙授首而孽振猖
狂振立將嗣凶荆郢幸天祚社稷義旗載捷狡徒沮潰朕
獲反正斯實宗廟之靈勤王之勲豈朕一人獨享伊祐
思與億兆幸茲更始其大赦改元唯立振一祖及同黨
不在原例賜百姓爵二級鰥寡孤獨穀人五斛大酺五

日

三年二月己酉大赦

五年正月辛卯大赦

六年五月己未以廣州刺史盧循反衛將軍劉毅與循戰敗於桑落洲大赦

十一年正月庚午大赦九月己巳大赦

十二年八月丙午大赦

十四年正月辛巳大赦

後魏道武初為代王登國七年生子嗣於雲中帝晚有

子聞大悅大赦天下

天興元年十有二月己丑帝臨於天文殿太尉司徒進
璽綬即皇帝位大赦改年

二年正月甲子祀上帝于南郊乙丑大赦京師

天賜元年十月辛巳大赦改元

明元永興元年十月壬申即位大赦改元

五年五月乙亥行幸雲中舊宮丙子大赦天下

神瑞元年正月辛酉以祥瑞頻集大赦改元

泰常元年四月壬子大赦改元

七年十月帝南巡為奚斤南討聲援十一月丙午曲赦
司州殊死已下

太武以泰常八年十一月壬申即位大赦天下

神麇元年四月戊午大赦天下

三年正月壬寅大赦天下

延和元年正月丙午立皇子晃為皇太子謁于太廟大
赦改元

太延元年正月甲申大赦改元

四年五月戊寅大赦天下

太平真君元年六月丁丑皇孫濬生大赦改元

九年十月大赦改元

十一年九月皇太子北伐曲赦定冀相三州死罪以下

正平元年五月壬寅大赦

文成興安元年十月戊申即位大赦改元

二年八月戊戌詔曰諸殊死以下各降罪一等

興光元年二月帝至道壇登受圖籙禮畢還京師班賞各有差七月庚午皇子生大赦改元

太安元年三月己亥詔曰今始奉世祖恭宗神主於太廟又於西苑遍秩羣神朕以大慶饗賜百寮而犯罪之人獨即刑戮非所以子育羣生矜及衆庶夫聖人之教自近及遠是以周文刑于寡妻至于兄弟以御于家邦化苟從近恩亦宜然其曲赦京師死囚以下六月壬戌詔名皇子曰弘曲赦京城改年

二年二月丁巳立皇子弘為皇太子大赦天下十月甲午以幸河西還曲赦京師

四年九月丙寅以太華殿成饗羣臣大赦天下

五年三月庚寅曲赦京師死罪已下

和平元年五月甲子朔大赦改元

六年正月丙申大赦天下

獻文以和平六年五月甲辰即位大赦天下九月庚子

曲赦京師

天安元年正月乙丑朔大赦改元三月辛亥帝幸道壇
親受符籙曲赦京師

皇興元年八月戊申皇子生大赦改元

二年六月庚辰以河南關地曲赦京師殊死以下

三年四月丙申名皇子曰宏大赦天下

四年四月辛丑大赦天下

孝文以皇興五年八月丙午即位大赦天下改元延興
延興二年正月曲赦京師河西南至秦湮西至枹罕北

至涼州及諸州

四年七月己卯曲赦仇池

五年六月壬申曲赦京師死罪遣備蠕蠕

承明元年六月壬申大赦改元九月丁亥曲赦京師十月辛未建明佛寺大宥罪人

太和元年八月壬子大赦天下

二年九月丙辰曲赦京師

三年三月甲辰曲赦京師十月己巳朔大赦天下

四年六月丁卯以澍雨大洽曲赦京師

五年二月辛卯朔大赦天下賜孝悌力田孤貧不能自存者穀帛有差免官人年老者還其所親

六年正月甲戌大赦天下

七年閏四月癸丑皇子生大赦天下

十年六月己卯名皇子曰恂大赦天下

十六年四月丁亥朔班新律令大赦天下

十九年四月帝自南伐齊迴曲赦徐豫二州其運漕之

士復租賦二年十一月甲申有事於圜丘丙戌大赦天下

二十年十月巳酉曲赦京師

二十二年十月帝北伐叛虜發懸瓠曲赦兗豫殊死以下復民田租一歲

二十三年正月伐齊至自鄆告於廟社癸卯行飲至策勲之禮甲辰大赦天下

宣武以太和二十三年四月丁巳即位於魯陽大赦天

下

景明元年正月乙巳大赦改元

二年二月大赦天下七月辛丑大赦天下

正始元年正月丙寅大赦六月甲午以歲旱錄京師見
囚殊死已下皆減一等鞭杖之坐悉皆原之

三年正月丁卯朔皇子生大赦天下八月戊申以大破
秦賊降呂苟兒秦涇二州平曲赦涇秦岐原河五州

永平元年八月丁卯大赦改年

三年三月丙戌皇子誦生大赦天下

延昌元年四月乙酉大赦改元

二年六月曲赦揚州八月辛卯詔曰自頃水旱互侵頻年饑儉百姓窘弊多陷罪辜煩刑之愧朕用懼矣其殺人掠賣之羣強盜首及雖非首而殺傷財主曾經再犯公斷道路劫奪行人者依法行決自餘恕死徒流已下各准減降

孝明以延昌四年正月丁巳即位戊午大赦天下七月

戊子帝朝太后於宣光殿大赦天下

熙平元年正月戊辰朔大赦改元

二年正月甲戌大赦天下

神龜元年二月己酉詔以神龜表瑞大赦改年八月癸丑詔曰朕冲昧纂歷未開政道皇太后殷憂在疚始覽萬機故獄犴淹枉百姓寃弊言念繁刑思存降省京師見囚殊死以下可悉減一等

二年二月乙亥大赦天下十一月庚午大赦天下

正光元年七月辛卯帝加元服大赦改年内外百官進位一等

五年六月丁酉大赦

孝昌元年二月戊戌大赦六月癸未大赦改年九月辛未曲赦南北兩秦州

二年四月大赦天下六月己巳曲赦齊州又曲赦平陽建興正平三郡

三年正月甲申曲赦關西及正平平陽建興等郡七月

己丑大赦天下十月戊申曲赦常農巴西河北平陽郡及關西諸州

武泰元年正月乙丑皇女生秘言皇子丙寅大赦改元二月甲寅皇子即位大赦天下

孝莊建義元年四月戊戌即位庚子巡幸河西時爾朱榮作逆殺靈太后諸王公卿等二千餘人列騎衛帝遷于便幕既而稽顙謝過辛丑入宮御太極殿詔曰太祖誕命應期龍飛燕代累世重光載隆帝緒冀欲闡茲洪

業永永無窮豈圖多難遘茲百六致使妖孽四起內外
競侵朝無恤政之臣野多怨酷之士寔繇女主專朝致
茲顛覆孝明皇帝天性冲順深存隱忍奄棄萬國衆用
疑焉苟求胡出入守神器凡厥有心莫不解體太原王
榮世抱忠孝功格今古赴義晉陽大會河雒乃推翼朕
躬膺茲大命德謝少康道愧前緒猥以眇身君臨萬國
如涉淵海罔知所濟可大赦天下改武泰為建義元年
從太原王督將軍士普加五階在京文官兩階武官三

級

永安元年九月乙亥以平葛榮大赦天下改元

二年四月癸未遷肅祖文穆皇帝文穆皇后神主于太廟曲赦畿內死罪至流人減一等徒刑以下悉免五月北海王顥為梁高祖立為魏主是月入雒帝北巡狩七月顥敗走庚午帝入居華林園升大夏門大赦天下

三年四月甲戌以關中平大赦天下九月辛卯天柱大將軍爾朱榮上黨王天穆自晉陽來朝戊戌帝殺榮天

穆於明光殿及榮子儀同三司菩提乃升閭闔門詔曰
蓋天道忌盈人倫嫉惡踈而不漏刑之無捨是以呂霍
之門禍譴所伏梁董之家咎徵斯在頃莽昌之末天步
孔艱女主亂正監國無主爾朱榮爰自晉陽同憂王室
義旗之建大會盟津與世樂推共成洪業論其始圖非
無勞勩但致遠恐泥終之實難曾未崇朝豺聲已露河
陰之役安忍無親王公卿士一朝塗地宗戚靡遺內外
俱盡假弄天威殆危神器時事倉卒未遑問罪尋以葛

賊橫行馬首南向因便乘勢用平醜虜及元顥問鼎大
駕北巡復致勤王展力所行以此論功且可補過既位
極宰衡地踰齊魯容養之至豈復是過但心如猛火山
林無以供其暴意等漏卮江河無以充其溢既見金草
稍寧方隅漸泰不推天功專為己力與奪任情臧否肆
意無君之跡日月以甚拔髮數罪曾未能紀而乃包藏
姦宄陰圖釁逆睥睨天居窺覲聖歷乃有裂冠毀冕之
心將為技本塞源之事天既厭亂人亦悔禍同惡之臣

密來投告將在必誅罪無容捨又元天穆宗室末屬名
望素微遭逢際會頗忝義舉不能竭其忠誠以奉國家
乃復棄本遂末背同即異為之謀主成彼禍心是而可
忍孰不可忍並已伏辜自貽伊戚元惡既除人神慶泰
可大赦天下十月戊申皇子生大赦天下文武百寮汎
加二級

前廢帝普泰元年二月己巳即位登闈闔門大赦詔曰
朕以寡薄撫臨萬邦思與億兆同茲慶泰可大赦天下

以魏為大魏改建明二年為普泰元年除名免官者特復本資品封依舊

後廢帝中興元年十月壬寅即皇帝位於信都城西升壇焚燎大赦改元

出帝太昌元年四月戊子即位升閭闔門詔曰否泰相沿廢興互有玄天無所隱精識弗能喻大魏統乾德漸區寓牢籠九服旁薄三光而上天降禎運距多難禮樂傾淪憲章漂滅赫赫宗周翦為戎寇肅肅清廟將成茂

草胡羯乘機肆其昏虐殺君害主剗剔海內競其吞噬
之意不識醉飽之心自書契以來未有若斯者也大丞
相渤海王忠存本朝精貫白日爰舉義旗志雪國耻故
廣門之軍貔虎奪氣鄴下之師金湯失險近者四胡相
率寔繁有徒驅天下之兵盡華戎之銳桴鼓暫交一朝
盪滅元兇授首大憝斯擒揚旆濟河掃清伊雒士民安
堵不失舊章社稷危而復安洪基毀而還構朕以託體
宸極猥當樂推祇握寶圖承茲大業得以眇身託於王

公之上若涉淵氷罔識攸濟思與兆民同茲嘉慶可大赦天下改中興二年為太昌元年

永熙元年十二月大赦天下改太昌為永興以明元年號尋改為永熙

三年二月壬戌大赦天下八月幸長安以雍州公廨為宮大赦

文帝以大統元年三月戊申即位大赦改元

九年七月大赦

後周閔帝元年正月辛丑即天王位柴燎告天大赦天下四月壬申詔死罪以下各降一等八月辛未詔曰朕甫臨大位政教未孚使乎民庶多陷刑網今秋律已應將行大戮言念羣生責在於朕宜弘肆眚與其更新其犯死者宜降從流流已下各降一等不在赦限者不從此降

明帝元年九月甲子即天王位大赦天下十一月丁巳詔曰帝王之道以寬仁為大諸有輕犯未至重罪及諸

村民一家有犯乃及數家而被遠配者並放還十二月
戊子赦長安見囚

二年四月辛未降死罪一等五歲刑已下皆原之七月
丙申順陽獻三足烏八月甲子詔曰夫天不愛寶地稱
表瑞莫不威鳳巢閣圖龍躍沼豈直日月珠連風雨玉
燭是以鈎命決曰王者至孝則出元命苞曰人君至治
所致虞舜烝烝來茲異祉周文翼翼翔此靈禽文考至
德下覃遺仁爰被遠符千載降斯三足將使三方歸本

九州翕定惟此大禮景福在民予安敢讓宗廟之善弗
宣大惠可大赦天下文武官並進二級十二月壬午大
赦天下

武成元年八月己亥改天王稱皇帝大赦改元

武帝以武成二年四月壬寅即位大赦天下

保定元年七月詔曰亢旱歷時嘉苗殄悴豈獄犴失理
刑罰失衷歟其所在見囚殊死以下一歲刑以上各降
本罪一等百鞭以下悉原免之

二年五月庚午以山南衆瑞並集大赦天下百官及軍人普加二級南陽宛縣三足烏所集免今年役及租賦之半

三年七月幸原州津門問百年降死罪一等

四年九月以皇世母閻氏自齊至

大家宰宇文護之母

大赦天下

天和元年正月癸未大赦改元百官普加四級

三年三月甲辰大赦天下亡官失爵並聽復舊

五年六月庚子以皇女生降宥罪人並免逋租懸調等

建德元年正月戊子幸玄都觀御法座講說公卿道俗
論難事畢還宮降死罪及流罪一等其五歲刑已下普
宥之三月誅大冢宰宇文護大赦改元四月立魯國公
贇為皇太子大赦天下百官各加封級

三年二月丙辰詔曰民生而靜純懿之性本均感物而
遷嗜欲之情斯起雖復雲鳥殊世文質異時莫不限以
隄防示之禁令朕君臨萬寓覆養黎元思振頽綱納之
軌式比因人有犯與衆棄之所在羣官有愆過者咸聽

首露莫不輕重畢陳纖毫無隱斯則風行草偃從化無
違導德齊禮庶幾可致但上失其道有自來矣陵夷之
弊反本無繇宜加蕩滌與民更始可大赦天下八月乙
未詔自建德元年八月以前犯罪未被推糾於後事發
失官爵者並聽復舊十月行幸蒲州乙卯曲赦蒲州見
囚大辟以下

五年十二月親征太原擒北齊安德王高延宗平并州
壬戌詔曰昔天厭水運龍戰于野兩京圯隔四紀于茲

朕垂拱巖廊君臨宇縣相邠民於海內混楚弓於天下
一物失所有若推溝方欲德綏未服義征不諛偽主高
緯放命燕齊怠慢典刑俶擾天紀加以背惠怒隣棄信
忘義朕應天從物伐罪弔民一鼓而蕩平陽再舉而摧
勅敵偽署王公相繼道左高緯知窮數屈逃竄草間偽
安德王高延宗擾攘之間遂竊名號與偽齊昌王莫多
婁敬顯等收合餘燼背城借一王威既振魚潰鳥離破
竹更難建瓴非易延宗衆散衿甲軍門根本既傾枝葉

自賈幽青海岱折簡而來冀北河南傳檄可定八紘共
貫六合同風行當偃甲靈臺休牛桃塞無疆之慶非獨
在余漢皇約法除其苛政姬王輕典刑彼新邦思覃惠
澤被之率土新舊臣民皆從蕩滌可赦天下高緯及王
公以下若釋然歸順咸許自新諸入偽朝亦從寬宥官
榮次序依例無失其齊制偽令即宜削除鄒魯縉紳幽
并騎士一介可稱並宜銓錄百年去殺雖或難希朞月
有成庶幾可勉

六年正月甲午平北齊帝入鄴詔去年大赦班宣未及之處皆從赦例

宣帝大成元年正月癸巳朔受朝於露門大赦二月傳位於太子衍自稱天元皇帝所居稱天臺大赦天下改大成年為大象元年

二年四月天元皇帝詔曰朕以寡薄昧於治方不能使天地休和陰陽調序自春涉夏甘澤未豐既軫西郊之嘆將虧南畝之業興言夕惕無忘鑒寐良繇德化未敷

政刑多舛萬方有罪責在朕躬思覃寬惠被之率土見
囚死罪並降從流流從徒五歲刑已下悉皆原宥其反
叛惡逆不道及常赦所不免者不在降例

靜帝以大象二年五月入居天臺大赦天下八月破尉
遲迴詔曰朕祇承洪業二載於茲藉祖考之休憑宰輔
之力經天緯地四海晏如逆賊尉遲迴才質凡庸志懷
姦慝因緣戚屬位冠朝倫屬上天降禍先皇晏駕萬國
深鼎湖之痛四海窮過密之悲獨幸天災欣然放命稱

兵擁衆便懷問鼎乃詔六師肅茲九伐而兇徒孔熾充
原蔽野諸將肆雷霆之威壯士縱貔貅之勢芟夷剪拂
所在如芥直指漳濱擒斬元惡羣醜喪魄咸集穀下順
高秋之氣就上天之誅兩河妖孽一朝清蕩自朝及野
喜忭相趨昔上皇之時不言為治聖人宰物有教而已
未戢干戈實深慙德思弘寬簡之政用副億兆之心可
大赦天下其共迴元謀執迷不悟及迴子姪逆人司馬
消難王謙等不在赦例

隋高祖開皇元年二月甲子即位大赦四月辛巳大赦
三年正月庚子將入雒陽新都大赦天下五月丙寅赦
黃龍死罪已下

四年六月庚子降囚徒

五年十二月丁未降囚徒

六年二月庚子大赦天下

七年十月庚申行幸同州以先帝所居降囚徒

九年十一月甲寅降囚徒

十三年九月丙辰降囚徒

十五年正月庚午帝以歲旱祠泰山以謝憊咎大赦天下
下四月己丑朔大赦天下

十九年正月癸酉大赦天下

仁壽元年正月乙酉朔大赦改元

四年正月丙辰大赦

煬帝大業元年正月壬辰朔大赦改元

二年四月辛亥御端門大赦免天下今年租賦

三年四月甲申頒律令大赦天下關內給復三年

四年八月辛酉親祠恒岳河北道郡守畢集大赦天下
車駕所經郡縣免一年租調

五年六月戊午帝在張掖大赦天下開皇已來流配悉
放還鄉晉陽逆黨不在此例隴右諸郡給復三年

八年四月丙申詔曰天地施化生育之德既弘皇王建
極戡濟之功斯大故能經綸四海撫育萬方朕嗣膺靈
命屬當負荷思隆景業克播鴻猷畷緯不占之鄉咸被

聲教梯航所絕之域罔弗來庭而遼左島夷獨懷逆命
惡甚夙沙罪深獫狁朕奉遵先志躬行弔伐爰整六師
親麾三令上憑宗廟之靈實賴幽明之德歷代逋醜一
鼓大定憬彼遐裔萬里肅清今凱旋云及長羸布氣宜
順茲含養與物惟新可大赦天下自大業八年四月十
六日昧爽已前大辟罪已下已發覺未發覺已結正未
結正繫囚見徒罪無輕重皆赦除之其常赦所不免謀
反大逆妖言惑衆語及國家並不在赦例其諸郡供軍

事者並給復一年其所役丁夫匠至涿郡者復二年至
臨榆關巴西者復三年至柳城巴西者復五年至通定
鎮巴西者復七年至渡遼鎮者復十年流配未達前所
亦宜放免除名解官併聽收叙其鰥寡孤獨不能自存
者量加賑贍高年之老賜以求帛并賜天下大酺五日
女子百戶牛酒孝悌力田義夫節婦并加旌異表其門
閭遼左之民新霑皇化宜遣刑部尚書正議大夫衛文
昇守尚書左丞劉士龍等巡撫存問仍給復十年即置

郡縣以相統攝若有奇能異等隨才任用同之齊民無
隔夷夏

九年正月戊戌大赦十月乙酉詔曰博陵昔為定州地
居衝要先皇歷試所基王化斯遠故以道冠幽風義高
姚邑朕巡撫氓庶爰屆茲邦瞻望郊廛懷敬思止所以
宣播德澤覃被下人崇紀顯號式光令緒可改博陵為
高陽郡赦境內死罪已下給復一年於是名高祖時故
吏皆量才叙職

十年十二月壬申帝如東都是月大赦天下

十一年八月突厥圍帝於雁門九月解圍而去丁未曲赦太原雁門郡死罪已下

恭帝義寧元年十一月壬戌即位於大興殿詔曰王道喪亂天步不康古往今來代有其事屬之於朕逢此百罹彼蒼者天胡寧斯恐襁褓之歲夙遭閔凶孺子之辰太上播越興言感動寔疚于懷太尉唐公膺期作宰時稱舟楫大楹橫流糾合義兵翼戴皇室與國咸休再造

區夏爰奉明詔弼予幼冲顯命光臨天威咫尺對揚尊
號悼心失圖一人在遠三讓不遂僂俛南面厝身無所
苟利社稷莫敢或違俯從羣議奉遵聖旨可大赦天下
改大業十三年為義寧元年十一月十六日昧爽已前
大辟罪已下皆赦除之常赦所不免者不在赦例

唐高祖武德元年五月甲子即皇帝位于太極殿下詔
曰舜禹殊時禪代存乎揖讓殷周異世革命事乎干戈
至於據龍圖握鳳紀統御皇極撫黎民奄有四方朝

宗萬國垂法作訓其揆一焉朕以寡薄屬彼澆季大業
末年網維廢弛三光改耀九服移心既戡定時難輯和
庶績一正海內再造黎元隋氏以天祿永終歷數攸在
敬禪厥位授于朕躬顧惟慙德屬當景運懼甚履冰凜
乎御朽上答蒼靈之睠俯順億兆之心寶歷初基溥天
同慶所宜布茲寬惠咸與惟新可大赦天下改隋義寧
二年為武德元年自五月二十日昧爽已前罪無輕重
已發露未發露皆赦除之子殺父奴殺主不在赦限百

官及庶人賜爵一級義師所行之處給復三年自餘給復一年孝子順孫義夫節婦旌表門閭孝悌力田鰥寡孤獨量加賑卹

二年二月甲午詔曰赦過宥罪哲王彝訓錄舊念功有國通典汾晉之地王迹所基戮力齊心夷凶靜亂惟彼士庶義越嘗倫犯禁陷刑宜從洗滌其并州涪州石州介州賈胡堡以北自武德二年二月二十四日以前犯辟罪已下已發覺繫囚見徒悉從原放五月癸未詔曰

朕恭膺寶命綏靜氓黎思俾宇內躋於仁壽而河湟之表比罹寇賊勾連凶醜擁隔朝風元元之民匪遑寧宴夙興軫慮旰食忘疲重勞師旅下令討擊馭以遐筭且事招懷而慕化之徒乘機立効兵不血刃費無遺鏃今凶狡即夷西垂克定遠人悅附改道惟新宜播惠澤與之更始可曲赦涼甘瓜鄯肅會蘭河廓九州自武德二
年五月十六日以前罪無輕重已發繫囚見徒悉從原免桀犬吠堯非無前喻弃瑕蕩穢列聖通規有惡言不

順及邪謀惑計者並從洗滌一無所問十月高祖幸華陰送出師也下詔曰朕祇膺靈命君臨區宇承凋弊之餘拯橫流之難雖復蠲除徭賦督課耕農安集黎元與之休息然而鯨鯢未翦四海多虞師旅游興事不獲已及其士卒浮惰苟求逸樂憚於征役離其營伍因此逃竄潛匿崎嶇盜竊為資規免朝夕良繇勸勵不明部署失所弛慢之責在於朕躬琴瑟不調已云變革多墜刑網情兼軫悼宜從寬宥許以自新其義士募人有背軍

逃亡者自武德二年十月二十日以前罪無輕重皆赦
除之饑寒困弊不能自存者所在官司隨事賑給

三年六月庚申詔曰朕發跡太原陳師汾澮底定皇室
廓清函夏惟彼晉魏事等豐宛近者妖寇憑陵侵斥郊
境害虐良善擁逼吏民大軍東討義存拯難芟夷醜類
實在弔民凡厥渠魁已就殲殄脅從之輩情有可原宜
許自新義深蕩滌其晉州潞州隰州并州等四總管內
自武德三年四月二十二日以前被劉武周宋金剛等

所誥誤者罪無輕重皆赦除之各令復業一所不問州
縣城堡有固守忠節抗禦凶徒者具錄聞奏別加褒賞
四年二月丁巳詔曰祝網泣辜彰乎舊典赦過宥罪著
自前經往者劉武周竊據邊陲擁逼良善石嶺以北皆
惟其弊雖復武周奔竄寄命蕃夷而殘黨餘氛尚懷旅
拒致使朔漠猶警關塞未寧屢動干戈久違聲教代州
總管定襄王大恩勤績允著安輯邊境討擊未賓率其
從化朕君臨天下義存撫育念彼彫弊若納諸隍但朔

方黎元逆命日久今雖歸附仍懷反側其代州總管府
內石嶺以北自從武德四年二月二十九日以前所有
愆犯罪無輕重悉從原宥可並令安居復業勿使驚擾
五月乙丑以竇建德平詔曰自隋氏失馭政散民流盜
賊交侵區宇離析喋喋黔首俱被焚溺之災元元無辜
並困豺狼之吻朕受天命君臨人極克除暴亂大拯黎
民聲教所覃無思不服唯彼趙魏尚隔朝風建德往因
喪亂連羣結黨竊州據邑擅置官寮叛換一隅恣行凶

虐朕憇彼河朔久遭塗炭納隍軫慮無忘典寢但以彫
弊之後惡煩士衆且事含弘未先討擊然而遊魂放命
數稔貫盈驅率犬羊圖為侵斥與王世充欲相救援輒
來舉斧以抗大軍兵威所臨醜徒皆潰生擒建德囚致
軍門凡厥支黨皆就虜獲歷年遁寇一舉廓清蕩滌遺
民與之更始可赦山東諸州舊為建德誑誤者自武德
四年五月八日以前皆赦其罪仍令太子左庶子鄭善
果為山東道撫慰大使考功郎中李觀玉膳部郎中高

正表為副存問民俗宣布朝章其有率衆全城因機立
效者量其功績就加職任竒才異行隨事旌擢其亡命
山澤仍為結聚詔書到後三十日不來歸首者復罪如
初六月庚寅詔曰朕初膺靈命撫育萬邦一物失宜憂
責在已是以昧旦丕顯晷食忘勞思流惠澤被於率土
日者世充作梗僭擅一方侵虐士民阻絕聲教罕洛之
地比邑連城受制凶威莫能自勉翹足引領乞師請降
朕愍彼黎庶獨為匪民命將出軍用申撫弔兵威所震

醜徒憎伏元惡頓顙面縛軍門殄滅氛祲混同文軌拯
彼烝民出乎塗炭宜從蕩滌與之更始可赦河南諸州
舊為世充所誑誤者自武德四年六月四日已前皆赦
其罪若有率其部衆保城邑因事立功以歸朝化者量
其効績就加職任奇才異行隨事旌擢鰥寡孤獨以時
恤理亡命山澤詔書到後三十日不來歸首者復罪如
初七月丁卯詔曰天生烝民樹之司牧光宅區宇撫字
黎庶日月始臨文明於是統極雷雨作解順時所以布

化往者隋氏代哀政刑廢缺九服雲擾五岳塵飛率土
之民墜於塗炭瞻天躋地控告無所朕愍彼橫流志存
拯溺投袂鞠旅肇建義旗伐暴除殘克寧宇縣靈祇叶
贊遐邇樂推歸運所集祗膺寶位戡翦多難綏輯遺氓
溥彼萬方情均覆育然而世充放命擾亂周韓建德遊
魂虔劉趙魏害虐良善阻絕朝風言念匪民久罹凶毒
盈滿之樂猶有向隅納隍之嘆無忘旦夕是以出軍命
將伐罪弔民宗廟威靈卿士效節旌旗所拂醜徒冰泮

二凶授首萬方廓清車軌大同氛祲澄蕩邊候解柝烽燧無虞振旅休徒凱歌里忭今既九圍靜謐八表又寧思與吏民勵精更始又惟寡德政道多違陰陽不調致茲亢旱深思惕懼震悼于懷解網崇恩宜流愷澤可大赦天下自武德四年七月十二日昧爽已前大辟罪以下已發露未發露悉從原免自武德二年十二月三十日已前亡官失爵者量聽叙用天下民庶給復一年其陝陽函虢虞芮六州供轉輸之費幽州管内久隔寇戎

給復二年身死王事量加褒贈律令格式且用開皇舊法孝子順孫義夫節婦所在詳例旌表門閭奇才異行隨狀薦舉高年惇獨量加贍卹

六年四月己未幸故宅祭元皇帝于舊寢以貞皇后配享詔曰朕恭膺大寶克隆景祚永言孝思聿追罔極肇惟自昔葺宇舊居王迹所基積慶攸在桑梓之敬每懷踐歷日不暇給以迄于茲今既氛祲廓清區夏寧謐民休俗泰天成地平爰擇良辰言還邑里禮同過沛事等

歸譙故老咸臻族姻相會肅恭薦享感慶兼集思伴歡
心逮于衆庶愍茲幽滯有懷寬釋都輦之地宗祏所居
祚固萬邦義越常等時惟孟夏方申長育宜歸天心宣
茲惠澤可曲赦京城內繫囚見徒及被推問應集之人
死罪已下並從放免其內有於政切害情理難原者宜
降死從流六月丁卯苑君璋及突厥吐屯設來寇馬邑
高滿政設二伏以待之突厥至城下伏兵發大破之斬
首二百餘級以滿政為朔州總管曲赦馬邑十月戊申

減死罪從流餘皆原放


七年四月甲子詔曰自有隋失馭盜賊交侵四海羣飛
六合雲擾上天降鑒爰命朕躬勘定凶災廓清宇縣然
而江湖之外水鄉僻遠向化之民未能自達逆賊輔公
祐驅扇凶醜蟻聚蜂屯侵虐黎民搖動城邑朕憫茲塗
炭義在弔撫命彼偏師聊申蕩伐沿流而下應機雷尅
氛祲清蕩遐邇乂寧文軌大同朝野咸慶今朱明戒節
時方長育宜順天心播茲仁惠可大赦天下自武德七

年四月一日昧爽已前大辟罪已下已發露繫囚見徒
悉原免其犯十惡劫賊官人枉法受財主守自盜及常
赦不免流已上道者並不在赦例亡命山澤挾藏軍器
百日不首者復罪如初其江州道行軍經途悠遠非無
勞倦應供運轉及從軍之內有犯罪除解官人立勲效
者並復官爵仍依本品隨才處分楊越之民新沾大化
見在民戶給復一年其與賊同心共為逆亂非被迫脅
情狀難原者不在此例

九年六月庚申皇太子建成齊王元吉內挾邪謀將危社稷皆伏誅是日詔曰朕恭膺寶位臨馭萬方綏育黔黎于茲九載欲使仁惠之政達於天下德義之方孚于宇宙豈謂莫大之釁近發蕭牆反噬之惡滅於天性皇太子建成地居嫡長屬當儲貳處以少陽冀克負荷遂昵近羣小聽受邪謀蔑棄君親離阻骨肉密圖悖逆潛為梟獍司徒齊王元吉寄深磐石任惟翰屏寵樹既厚職位非輕背違天經協同元惡助成隱慝遞相驅扇醜

心逆迹一旦盡彰惟彼二凶罪窮數稔禍不旋踵用取
屠戮念茲醜惡慙恨盈懷今禍難既除氛祲澄蕩國步
夷坦政道惟新思與萬民滌除更始可大赦天下自武
德九年六月四日申時已前罪無輕重已發露未發露
繫囚見徒悉原免凶逆之事止在二人自餘徒黨其被
誣誤一無所問各從曠蕩其僧尼道士女冠宜依舊軍
國事皆受秦王處分是月廬江王瑗為幽州大都督舉
兵反王君廓斬瑗傳首京師癸未赦幽州都督管內文

武官人及民庶被瑗拘逼淪陷逆黨者罪無輕重咸從
蕩滌



冊府元龜卷八十三